

**Perkembangan Kes Rakyat Malaysia Diculik Di Nigeria Dipantau – Kohilan Bernama  
8 Ogos, 2012**

PUTRAJAYA, 8 Ogos (Bernama) -- Malaysia sedang mengumpul maklumat berhubung kes penculikan seorang rakyat Malaysia oleh sekumpulan bersenjata api di Nigeria pada Sabtu lepas.

Timbalan Menteri Luar Senator A. Kohilan Pillay berkata setakat ini belum ada perkembangan terkini berhubung kes itu yang menyaksikan warga Malaysia dan tiga lagi warga asing diculik, susulan serangan maut ke atas kapal milik sebuah syarikat perkhidmatan minyak di Teluk Guinea.

"Kedutaan Malaysia di Abuja sedang memantau rapi perkembangan kes ini," katanya kepada pemberita selepas upacara menaikkan bendera sempena Hari Asean ke-45, di sini pada Rabu.

Agensi berita asing melaporkan sekumpulan lelaki bersenjata api menyerang dua kapal milik Sea Trucks Group yang menyediakan perkhidmatan kapal sokongan untuk syarikat minyak dan gas di Nigeria, kira-kira 35 batu nautika dari Delta Nigeria, kawasan pantai yang kaya minyak.

Kawasan delta itu yang sebelum ini sinonim dengan serangan ganas penjenayah serta insiden culik dilihat semakin tenang susulan program pengampunan oleh kerajaan beberapa tahun tahun lepas.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=686510>